

#HUNTU

HUNTU PA DILANTI!

Programma di akshon MPB
2023 - 2027

MOVEMENTU DI PUEBLO BONERIANO

Kralendijk, Bonaire CN

+599 701 7722 // +599 7953298

frakshon@partidompb.com

www.movementupuebloboneriano.com



INTRODUKSHON

Kuater aña pasá, nos, komo Movementu di Pueblo Boneriano a haña konfiansa di bo, e votadó, pa traha na un mihó Boneiru, ku nos tur meresé. Ku partido UPB nos a forma un koalishon i a repartí tema bou di e partidonan. P'esei nos por a traha e último kuater añanan dentro di e karteranan:

- **ámbito sosial;**
- **enseñansa;**
- **Salubridat públiko;**
- **ekonomia;**
- **turismo;**
- **finansa públiko.**

Den esenan nos a logra hopi resultado, i hasta durante e krisis mundial di COVID nos por a pèrkurá ku Boneiru a sali relativamente fuerte for di esaki. Nos a laga mira ku nos por realisá un gobernashon stabil i fuerte.

E periodo di gobernashon benidero, nos por sigui traha riba e fundeshi akí ku nos a pone. Pa e áreanan ku ta pafó di nos karteranan, nos a formulá plannan kla pa e periodo di gobernashon benidero. Den esenan tin kon nos ta bai realisá dunamentu di tereno, infrastruktura i bibienda pagabel pa tur hende. Ku esaki ta bini un vishon ainda mas kla pa determiná i ehekutá maneho pa Boneiru.

Nos ta haña ku na Boneiru mester ta asina ku:

Ningun hende no ta biba bou di e márgen di pobresa;

Tur hende por hür òf kumpra un bibienda pagabel;

Kaminda mester ta drechá i seif;

Tur hende, henter nan bida por sigui desaroyá nan mes ku posibilidat pa sigui siña;

Gobièrnu ta na servisio di bienestar di nos hendenan.


Esaki nos lo logra bayendo huntu dilanti:

HUNTU PA DILANTI!

Amor i atenshon pa nos **sosiedat, kultura i naturalesa** ta ún di nos prinsipionan i nos ta haña ku nos mester realisá un Boneiru riba kua nos por biba na pas i den trankilidat, ku atenshon pa otro i nos ambiente.

“ E programa akí ta splika kon nos ta bai sigui realisá esaki e kuater añanan ku ta bini. Nos a formulá meta kla, ku ta e base pa un mihó Boneiru, pa abo. ”

Hennyson Thielman



NOS METANAN PA E PERIODO DI GOVERNASHON BENIDERO

1. Progreso sosioekonómiko pa tur habitante.
2. Desaroyo ekonómiko duradero.
3. Mantenshon di identidat, balorashon di nos kultura.
4. Protekshon di naturalesa.
5. Oportunidat amplio di enseñansa pa tur hende.
6. Disponibilidat di deporte, salú i kuido pa tur habitante.
7. Infrastruktura bon mantené i seif.
8. Finansa di Entidat Públiko Boneiru (EPB) sano i gobernashon transparente i íntegro.

NOS PRINSIPIONAN A BASE DI KUA NOS TA FORMA I LOGRA NOS METANAN:

Sostenibilidat:

Prosperidat ekonómiko mester ta den balanse ku mantenshon di nos naturalesa í nos kultura í nos identidat.

Inovashon:

Semper ku ta posibel, nos ta utilisá teknologia kontemporáneo pa logra nos metanan.

Kalidat:

Den kaso di eskoho ku konsekuensia profundo, mester demostrá e ekilibrio entre kalidat i kantidat kaminda e eskoho pa kalidat tin preferensia.

KONTENIDO

Na promé lugá nos ta splika ken nos ta i kiko MPB ta para p'e. Despues nos ta splika a base di nos metanan i kon nos ke realisá eseiinan e kuater añanan ku ta bini. Despues nos ta deskribí kon nos ta bai realisá finansiamentu pa e metanan akí. Na fin di e programa di elekshon akí, por mira pa ken bo por vota si bo ta kompartí nos vishon i huntu ku nos ke mira Boneiru sigui bai dilanti.

1. Introdukshon
2. Kontenido
3. MPB
4. Progreso sosioekonómiko
5. Prioridatnan pa progreso sosioekonómiko
6. Desaroyo ekonómiko duradero
7. Prioridatnan pa desaroyo ekonómiko duradero
8. Mantenshon di identidat i balorashon di kultura
9. Prioridatnan mantenshon di identidat i balorashon di kultura
10. Protekshon di naturalesa
11. Prioridatnan protekshon di naturalesa
12. Oportunidat di enseñansa amplio pa tur hende
13. Prioridatnan oportunidat di enseñansa amplio pa tur hende
14. Disponibilidat di deporte, salú i kuido pa tur habitante
15. Prioridatnan disponibilidat di deporte, salú i kuido pa tur habitante
16. Infrastruktura bon mantené i seif
17. Prioridatnan infrastruktura bon mantené i seif
18. Finansa EPB sano i un gobernashon transparente i íntegro
19. Prioridatnan finansa EPB sano i un gobernashon transparente i íntegro
20. Finalmente
21. Lista elektoral MPB





MPB

Nos ta basa nos riba un base **sosial kristian ku un mira liberal riba desaroyo**. Desaroyo i bienestar (prosperidat i kalidat di bida) ta derecho di kada ser humano. MPB a desaroyá un vishon pa término largu i **solushon pa término kòrtiku pa sigui fortifiká** i/òf logra esaki. Aki progreso **sosial, kresementu duradero i kontrolá i liderato inovativo i íntegro ku rèspèt pa kultura, naturalesa i identidat di Boneiru ta primordial**.

A funda MPB statutariamente 15 di desèmber 2013. Nos a skohe pa un struktura di organisashon sólido, ku ta pèrkurá ku esaki ta un **refleho di nos komunidad**. MPB ta dediká hopi atenshon na formashon di su hendenan pa medio di entrenamentu i trayektonan di liderato. Den MPB tur kategoria di edat i sektor di sosiedat ta representá ku hendenan ku ta traha den e sektor ekonómiko, sektor finansiero, enseñansa, deporte, kultura, kuido di salú i e sektor primario (agrikultura i peska). Asina nos por tuma e desishonnan korekto pa futuro di Boneiru.

KIKO TA MISHON DI MPB?

MPB ta para pa un sosiedat **duradero, seif, harmonioso, transparente i inovativo**. Nos ta mira tambe komo nos mishon pa pèrkurá ku:

- tin desaroyo sosial i ekonómiko, pero na mes momentu esaki mester kondusí na un nivel di bida mas haltu pa tur habitante di Boneiru;
- desaroyo ekonómiko ta kana pareu ku maneho di naturalesa i kultura i no a kosto di esakinan, sino hustamente ta probechá di e hopi oportunidatnan di desaroyo ku naturalesa ta ofresé, entre otro usando solushonnan duradero inovativo;
- ta respetá derecho humano ku trato igual pa tur hende;
- trata otro i nos ambiente di bida ku rèspèt i sostenibilidad;
- kompartí benefisio i desbentaha igualmente;
- ta promové inisiativanan ekonómiko prometedó stimulando empresarionan pa invertí i inová;
- desaroyo ta igual ku kalidat i aserkamentu integral;
- un bida largu di siñamentu ta base di desaroyo pa tur habitante di Boneiru;
- ta salbaguardiá kultura i identidat di Boneiru;
- hóbennan ta lanta den un ambiente ku ta enkurashá nan pa desaroyá nan talentonan optimalmente;
- ta utilisá totalmente e balor adishonal di Reino;
- ta garantisá gobernashon hustu i seguridat hurídiko;
- gobièrnu ta aktua ku integridat i ta sirbi komunidad.

MPB a desaroyá un vishon di término largu i solushon di término korto kaminda progreso sosial, kresementu duradero i liderato inovativo i íntegro ku rèspèt pa kultura, naturalesa i identidat di Boneiru ta primordial.

MPB ta konsiderá komo su enkargo pa laga Boneiru atras den un estado mihó i mas fuerte pa nos yunan i nietunan. P'esei MPB ke krea pa Boneiru un sosiedat duradero den kua logronan esensial ta ankrá.



#HUNTU



PROGRESO SOSIOEKONÓMIKO

Riba tereno sosioekonómiko, nos na Boneiru ta enfrentá **reto grandi**. Tin hopi boneriano ku ta biba bou di e márgen di pobreza. Na Boneiru nos tin un sifra di **desempleo abou**, pero tin un trabou na Boneiru **no ta un garantia ku bo por paga bo gastunan**. **Tin biaha hendenan tin dos òf tres trabou: ketu bai trabou no ta paga suficiente**. Mundialmente preis ta sigui subi den supermarket i di elektrisidat, awa i kombustibel. P'esei e situashon akí ta sigui empeorá aki tambe: kada bes ta bira mas **difísil pa kubri gastu**.


Mínimo sosial

Komo gobernante i ku kooperashon desidido i estrecho ku stakeholdernan (manera sindikato, organisashonnan di dunadó di trabou i di empresario, bònt di konsumidó) MPB a lucha e último añanan pa sosten igual for di Reino pa nos siudadanonan i empresanan manera na Hulanda Europeo. Ademas proaktivamente nos a konvensé gobièrnu hulandes ku mester mehorá nos entradanan i provishonnan. Nos no a yega ainda, pero en todo kaso ya a realisá e siguiente resutadonan:

- a oumentá suèldu mínimo ku 38% i ta sigui oumentá esaki gradualmente;
- a oumentá AOV (penshun di behes) ku 63%;
- a hisa e montante liber di impuesto di \$ 12.198 pa \$17.352;
- a oumentá kompensashon pa yu di \$62 pa \$131, i a introdusí e kompensashon dòbel pa yu;
- E último periodo Kolegio Ehekutivo a apliká un rekargo pa energia i un supsidio èkstra pa elektrisidat, komo sosten èkstra riba e sosten for di Hulanda;


SUÈLDO MÍNIMO (Báldo for di 21 aña)

OUMENTO DI:
\$341 (38%)




PENSHUN DI BIEHES (FUL)

OUMENTO DI:
\$403 (63%)




KOMPENSASHON PA YU

OUMENTO DI:
\$69 (111%)




MONTANTE BÁSIKO ÒNDERSTANT

OUMENTO DI:
\$74 (21%)




KOMPENSASHON PA PERSONA KU TA BIBA INDEPENDIENTE

OUMENTO DI:
\$260 (194%)



KOMPENSASHON ÒNDERSTANT PA PERSONA INKAPASITÁ PA TRAHA

OUMENTO DI:
\$294 (125%)



Movimentu di
Pueblo Boneriano

Apesar di nos insistensia, te ainda no a fiha un mínimo sosial. Sí a inisiá un trayekto di investigashon pa esaki. E plan ta pa fiha esaki promé ku fin di 2023.

MPB ta pèrkurá ku e ta partisipá **estrechamente den e trayekto akí i ku ta duna prioridat na esaki**. Una bes ku establese e mínimo sosial, esaki ta sirbi komo base pa e medidanan ku mester **pèrkurá ku ningun hende no ta biba bou di e márgen di pobresa na Boneiru**. E ora ei nos por pèrkurá ku hendenan ku ta, òf bira, inkapas pa traha, i hendenan ku yega edat di penshun, ta sigur ku nan por kubri nan gastunan.

Ademas di oumentá entrada, mester baha kosto di bida. Algun **kosto di bida ta difisil pa Boneiru mes baha**, pasobra nan ta **dependé di sirkunstansianan global i faktornan manera preis di kombustibel, di transporte i di produktonan di alimentashon**. Den e rapòrt di Regioplan di 2018 a stipulá ku ademas di alimentashon, e kostonan di bibienda, akohida pa mucha i transporte ta e tres gastunan mas grandi pa un famia promedio na Boneiru.

Nos ta pèrkurá ku e kostonan akí ta baha signifkativamente pa tur kas di famia.

Nos ta bai hasi esaki ku transporte públiko supsidia i trahamentu rápido di bibienda pagabel. Banda di esei, anteriormente ya kaba nos a dal algun paso bunita ku e ministerionan enbolbí pa hasi akohida pa mucha grátis pa tur habitante.

Desaroyo personal

Fihamentu di e mínimo di eksistensia i ahustamentu di entrada na esaki di nos siudadanonan, ta un promé base, pero nos ambishonnan ta bai muchu mas leu. Nos ta haña ku habitantenan di Boneiru mester haña e oportunidat pa tin un entrada ku ta mas haltu ku e mínimo di eksistensia. Pa por realisá esaki, formashon personal ta hopi importante. **Si nos habitantenan por sigui desaroyá nan mes, huntu nos por sigui traha na un sosiedat inovativo, produktivo i partisipativo**. Kada siudadano mester haña un oportunidat hustu i – kaminda ta nesesario – haña yudansa pa por desaroyá su propio talento. Di e manera akí ku propio forsa e por realisá un bon entrada. **Hende mester tin perspektiva**; mester rekompensá tumamentu di inisiativa.

Nos a kuminsá kaba ku organisashon di diferente entrenamentu i kurso den kooperashon ku sektor privá. Ku esakinan, trahadónan mes por sigui desaroyá nan mes, i na mes momentu nos por hisa e nivel di konosementu i servisio. Di e manera akí ta oumentá e posibilidatnan pa un entrada mas haltu. Nos ta haña tambe krusial ku nos ta trese kambio den nos programanan di enseñansa, asina no por ofresé studiantenan hóben mas posibilidat. Tokante esaki, nos ta skirbi mas na nos vishon pa enseñansa, mas aleu den e programa di elekshon akí.

Ambiente seif

Nos ta haña hopi importante pa duna e sosten nesesario na víktimanan di violencia doméstiko. Di e manera akí nos por ofresé nan un **ambiente alternativo seif i yuda nan pa prosesá eksperensia traumátiko**. Den e último periodo di gobernashon, MPB a dal paso grandi pa traha un Sentro di Hustisia Familiar pa ofresé e sosten nesesario na e famianan akí. Un ekipo di eksperto ta guia e famianan durante e tempu ku ta nesesario pa yuda nan bolbe riba e kaminda pa un **futuro positivo i seif**. Mester sigui ku e programa akí.

Maneho di tereno

Ta introdusí i implementá e maneho di tereno ku mientrastantu a stipulá pa Boneiru. Esaki ta nifiká tambe ku nos mester pèrkurá pa kumpli ku esaki, asina **tur hende na Boneiru tin mesun oportunidat pa tin un tereno**, pa konstrukshon di un kas òf espasio pa negoshi. Nos ta skirbi mas tokante esaki na e parti tokante infrastruktura.

“ *Invershon den desaroyo i seguridat di nos muchanan, dunando nan oportunidat pa siña, eksperensia i eksplorá, ta elementonan importante pa un bon futuro, pa henter Boneiru.* ”

Renata Domacassé



HUNTU PA DILANTI!



Konstrukshon di bibienda

Den e último añanan Boneiru a krese hopi, prinsipalmente pa motibu di migrashon. Esaki a oumentá enormemente e preshon riba e merkado di bibienda. Nos lo **stimulá konstrukshon di bibienda, pasobra di un banda un propio bibienda tin komo konsekuensia un klase medio mas fuerte den sosiedat.** Di otro banda nos ta bai inisiá dos proyekto pa e merkado di bibienda di hür, kaminda riba término korto den koordinashon ku Ministerio di Asuntunan di Interior i Relashon ku Reino nos lo importá kas prefabriká pa aliviá e nesesidat agudo ku tin. **Ademas pa término largu huntu ku Fundashon Cas Boneriano i otro partidonan privá, nos lo traha na bibienda sosial i di segmento medio pa nos poblashon.**

Ademas nos ta sigui mantené e desishon ku nos a tuma huntu ku otro pa obligá proyektonan di konstrukshon nobo pa minimalmente traha **25% bibienda sosial i 25% bibienda di segmento medio.** Aki tambe MPB ta sigui traha na kalidat i ta haña importante ku tambe na bibienda sosial ta bini un ambiente di bida mas mihó, ku por ehèmpel mas bèrdè den kurá.

Kresemantu di poblashon

Nos sosiedat ta riku na hopi nashonalidat ku histórikamente ta biba huntu den harmonia pasífiko. Un tempu mayoria hende a bini pa yuda Boneiru sigu desaroyá ku nan konosementu, eksperensia i kompromiso. Awor ku e afluensia ta mas haltu, MPB ke manehá esaki bon, asina ku esaki no ta destabilisá nos sosiedat. **MPB ta traha na esaki ku un maneho ku ta funshoná bon kaminda integrashon ku ta kuadra ku [kultura i identidat di Boneiru ta importante.](#)**

Nos a kuminsá ku revishon di legishon pa guia imigrashon den direkshon korekto i kaminda ta nesesario, frena esaki. Ku sosten di un estudio di Kapasidat di Akohida den kooperashon ku Banko Mundial, ta studia nos maneho di migrashon i kon nos por regulá esaki mihó. Asina nos por ankra estableimentu na Boneiru na kondishonnan di integrashon, i duna habitantenan ku rais na Boneiru prioridat pa kumpra un bibienda trahando un ordenansa di bibienda. Desafortunadamente nos ta mira un aktitut ku ta bira mas duru i un distansia kada bes mas grandi entre gruponan di poblashon. **Nos ke promové un mihó koheshon sosial i mas union kreando mas área di rekreashon, organisá aktividat den barío asina tur grupo di poblashon ta topa otro, kampaña di formashon i konsientisashon, mihó kumplimentu ku regla i por ehèmpel preparashon di e bonerianonan nobo ku kondishonnan/eksigensia di integrashon di un nivel básiko di papiamentu den sierto sektor.**

Transporte públiko


Transporte pa hopi famia na Boneiru ta ún di e gastunan mas grandi. Pa motibu di e preisnan di kombustibel ku mundialmente ta subi, esaki a subi mas último añanan. Na e momentu akí no tin un transporte públiko bon organisá na Boneiru.

Nos ke realisá e transporte públiko bon organisá akí pa Boneiru. Nos ke hasi esaki ku subsidio di gobièrnu pa tene e gastunan mas abou posibel. MPB a pèkurá ku a reservá un montante pa transporte públiko riba e presupuesto di 2022-2023 di EPB. Mester desaroyá e sistema di transporte públiko kontinuamente tambe ku uso di teknologia moderno, **manera por ehèmpel ku un orario ku ta digitalmente aksesibel.**



PRIORIDATNAN PA PROGRESO SOSIOEKONÓMIKO

- **Sigui introdusí disposishonnan igual manera na Hulanda Europeo, kooperando proaktivo ku gobièrnu di reino pa un eksistensia digno pa tur nos siudadanonan ku yudansa di:**



- introdusí kompensashon pa desempleo;
- mihó provishon di penshun: AOV riba e nivel di mínimo di eksistensia i introdukshon di insentivo pa dunadó di trabou apliká provishon di penshun komplementario;
- sosten sosial pa esnan ku mas mester di esaki;
- un fondo general di penshun pa trahadónan den sektor privá;

Keda alerta pa kosto di bida

- sigui implementá e programa di Bon Kompra Plus.

Promové e kapasidat pa yudanan mes di nos siudadanonan ku

- Invershon den enseñansa adekuá;
- ofresé akohida pa mucha grátis i mas amplio (akohida anochi pa trahadónan ku orario iregular);

Kontrolá kresementu di poblashon

- traha i introdusí ordenansa di bibienda;
- ku yudansa di legislashon, guia imigrashon den bon direkshon na un manera humano

Maneho bibienda

- stimulá konstrukshon di bibienda pagabel;
- mantené regla pa konstrukshon di 25% bibienda sosial i 25% bibienda di segmento medio den proyekto di desaroyo nobo;
- importá kas flèksibel (prefabriká) pa e nesidat agudo di bibienda;

- stimulá konstrukshon di bibienda pagabel propio;
- dunamentu di èrpagt efektivu fasilitando siudadano, famia i empresa pa traha un kas/empresa propio;
- mihó aksesu na hipotek pagabel;
- plan integral pa desaroyo di barío i konstrukshon di bibienda sosial;
- stimulá konstrukshon di bibienda propio òf pagabel i promové aksesu na bibienda;
- bibienda pa hende grandi;
- un vishon i plan sólido pa un desaroyo espasial ordená di Boneiru;
- implementá e maneho di tereno stipulá i kumpli ku esaki.

Stimulá koheshon sosial i union

- krea mas área di rekreashon públiko i tereno di deporte;
- embeyesé espasionan públiko i playa;
- organisá aktividat den barío;
- desaroyo di barío: krea den kada barío un sentro pa hende bini huntu, hasi kompra, deporte i rekreashon;
- kampañanan di formashon i konsientisashon;
- mihó mantenshon di e reglanan di e plan di desaroyo espasial.

Transporte públiko

- introdukshon di un ret di transporte públiko konfiabel i pagabel, ku un konsepto amplio

Servisio sosial strukturá pa medio di

- Aksesu;
- Plenchi di Trabou;
- Indebon;
- Sentro di Hustisia Familiar



DESAROYO EKONÓMIKO DURADERO

MPB ta para pa un **progreso ekonómiko balansá ku ta sirbi bienestar di nos siudadanonan i ku ta kana pareu ku protekshon di naturalesa i maneho di kultura. Nos ta enfoká riba kalidat en bes di kantidat.** Nos ta opinion ku ta importante pa pueblo tuma parti aktivamente i plenamente na e ekonomia, na un manera ku bienestar di e pueblo ta na promé lugá. MPB ta kere firmemente ku Boneiru por fortalese su posishon komo esun ku ta marka pouta, no solamente riba tereno di maneho di naturalesa, pero tambe riba tereno di aktividat inovativo i di kapasidat **empresarial vibrante, basá riba nos propio identidat i kultura outéntiko.**

Nos ta di opinion ku **ekonomia mester sirbi hende** i no nèt kontrali. **Un ekonomia saludabel ta e motor pa un sistema sosial saludabel.** Nos ta kere ku ta importante pa stimulá kapasidat empresarial, pasobra asina nos por garantisá ku tin mas **ménos huida di kapital** posibel.



Kapasidat empresarial

Un bon klima empresarial ta un kondishon importante pa desaroyo ekonómiko **duradero.** Pa por realisá esaki nos ta di opinion ku gobièrnu lokal mester sòru pa asuntunan manera pa **gobièrnu ta bon aksesibel digitalmente, i un lokèt sentral pa asuntunan empresarial ku ta funshoná bon.**

Mester atendé ku kompetensia inhustu for di pafó, ku ayudo di legislashon lokal. Ademas ta importante pa empresanan lokal tin aksesu na posibilidatnan di finansiamentu benefisioso i na subsidio di gobièrnu. Prinsipiantenan ta hunga un papel importante den inovashon ekonómiko, diversifikashon i durabilidad. Hopi bia hóbennan ta tuma e inisiativa, i afortunadamente esei ta e kaso na Boneiru tambe. **E BusinessSpark incubator/accelerator** ta e promé stap den un programa pa lanta múltiple 'incubators', den kua prinsipiantenan sostenibel tin un lugá pa krese, den kolaborashon ku organisashonnan lokal. Di e forma ei nos ta krea kapasidat pa yuda bo mes, mas empleo i nos por bira mas **duradero** ainda.

Nos **merkado laboral** pèrtá, kombiná ku e ambishonnan ku nos tin komo Boneiru, ta rekerí regularmente, **pa hendenan di pafó di Boneiru establese nan mes sea ta temporalmente òf no.** Pa e personanan ku por establese nan mes aki solamente ku un pèrmit di trabou, nos ta buskando huntu ku e ministerionan responsabel kon pa **reduzí e tempu ku e prosedura** ta tuma i pa simplifiká e prosedura. Den esaki nos no ta pèrdè for di bista ku nos tin mester di legislashon pa prevení asuntunan manera trafikashon i abuso di hende. No ta studia por ehèmpel posibilidatnan pa reduzí e prosedura pa dunadónan di trabou ku por proba ku nan ta tene nan mes na e **reglanan di kondukta komo bon dunadó di trabou.**

Komo 'munisipio' di Hulanda, Boneiru regularmente no ta bin na remarke serka organisashonnan na Hulanda Oropeo ku ta responsabel pa asuntunan manera promoshon di kapasidat empresarial, promoshon di komersio, subsidio i areglonan finansiero speshal i atraktivo. **MPB ta di opinion ku mester ta opvio ku e organisashonnan akí tambe ta sirbi interes di Boneiru i ta keda pidi atenshon pa esaki** i hasi proposishonnan serka e organisashonnan konserní i e ministerionan responsabel.

Nos ta mira opviamente ku un gran parti di empresarionan na Boneiru ta hopi komprometí pa duna un kontribushon na progreso sosioekonómiko di nos isla. Pero naturalmente nos ta mira tambe ku tin un límite na nan kontribushon na esaki, si nan no tin e siguransa ku nan lo por generá suficiente volúmen i márgen di benta. MPB pa e motibu ei ta i ta keda den kombersashon ku representantenan di empresario- i dunadónan di trabou di tur sektor **organisá tokante e kondishonnan esensial pa e modelo di ganashi den kua empresanan boneriano por krese.**

TURISMO DI KALIDAT

De e último periodo di gobernashon nos a stipulá e STMP (Plan Maestro di Turismo Stratégiko) i gobièrnu a desaroyá un Plan di Rekuperashon di Turismo. Esaki a konfirmá enfátikamente e eskoho pa turismo di kalidat pa Boneiru. Un promé stap importante ku a dal den esaki ta ku a profeshonalisá TCB i a mehorá kobransa di e impuesto di turista di estadia. Nos ta para pa un desaroyo duradero, kaminda ta pone interes komun di habitante, bishitante i empresanan den balansa i e ta keda balansá.

Di propósito pa medio pa prosperidat i bienestar. Turismo pa largu tempu tabata un meta riba su mes, ku balor ekonómiko agregá komo e motor dominante. Nos ta mira ku kompanianan den e sektor akí ta benefisiá di esaki, pero riba algun área habitantenan lokal ta muchu tiki embolbí i tin muchu tiki probecho direkto di dje, tin bia pa motibu ku nan no ta konsiente di e posibilidatnan den e sektor. Ademas tin sierto lugánan, manera naturalesa i patrimonio, ta hala hopi bishitante loke ta bai a kosto di konservashon.

Ku e eskoho pa kalidat a skohe un rumbo ku ya for di awor kaba ta duna fruta. E strategia ku a skohe ta pa mantené turismo manehabel i pa turistanan kontribuí na un manera duradero na desaroyo di Boneiru. Un mihó kalidat ku mas balor ekonómiko, i ku empleadonan ku ta mihó prepará ku por gana un bon entrada.

Riba enkargo di EPB, Banko Mundial a hasi un investigashon di 'Kapacidad/limitashonnan pa karga kambionan aseptabel' ('Carrying Capacity / Limits of Acceptable change') pa tantu pueblo komo turismo i su impakto riba naturalesa, infrastruktura i fasilidatnan. Ta spera resultado na 2023 i lo inkluí rekomendashon- i prioridatnan di e rapòrt den nos maneho adishonal.

Ora ku sigui desaroyá di turismo krusero pa MPB durabilidad tambe tin prioridat. Tantu kantidat di bishitante komo kantidat di barku mester keda den balanse optimal ku naturalesa i kultura. Pa e motibu ei a stipulá e maneho di un barku i solamente un barku ku mas di 700 pasahero por mara den haf pa dia. **Ta sigui traha riba plannan pa sigui desaroyá nos produkto turístiko di manera respetuoso, pa, entre otro, regla distribushon di e impakto di turismo krusero riba naturalesa i kultura mihó.** Den e aña ku a transkurí Boneiru a logra posishoná su mes muchu mas fuerte den e merkado di turismo krusero, di manera ku Boneiru ta bai eskoho di **barku- i turistanan krusero** ku ta gasta mas ora nan ta riba e isla.


Huntu ku gobièrnu hulandes nos lo krea un fondo ku lo hasi posibel pa sigui alsa kalidat di nos produkto turístiko i turistanan ku ta gasta mas pa dia. Ademas nos lo bai hasi uso di 'crowd management' pa tin ménos preshon riba áreanan spesífiko ku ta popular. Den e añanan resien nos a mira un kresementu den e proporshon di turista for di Oropa, kompará ku turistanan for di Nort-Amérika. **Nos kier balansá esaki mas i trese turistanan aktivo di partikularmente Nort-Amérika Boneiru i usa e fondo pa promové mas transporte aéreo for di den region.** E motibu su tras ta, ku hustamente nos kier trese turistanan Boneiru ku tin un komportashon di konsumo haltu ora nan ta na Boneiru. Turistanan for di Nort-Amérika ta gasta kasi 2 bia mas tantu pa dia ku un turista di por ehèmpel Hulanda Oropeo.

Habitantenan sentral

Manera nos a indiká anteriormente kaba, pa MPB habitantenan di Boneiru ta sentral i desaroyo ekonómiko ta sirbi nos, komo habitante. Desaroyo di nos isla ta eksigí invershonnan públiko-privá, mará na proyektonan konkreto, riba un gran kantidat di tereno. MPB tin un agènda di akshon i invershon nashonal, na kua **Boneiru, Gobièrnu Sentral, provinsia, empresario i organisashonnan di merkado** huntu ta duna contenido i ku huntu nos ta hinka nos skouder bou di dje. Nos ta hasi esaki basá riba interesnan kompartí na bienestar di un isla vital. P'esaki lo tin mester **tambe di struktura di finansiamentu públiko-privá**, kaminda ta forma strukturanan basá riba kooperashon entre diferente sektor interesá i pa laga e impuestonan bai direktamente pa inisiativanan ku ta kontribuí na e prioridatnan stratégiko.

Den e próksimo 5 añanan benidero lo invertí kasi \$1 miar den invershonnan semi públiko na Boneiru. Un kalkulashon bruto di algun di e invershonnan grandi akí ta:

- Haf di kòntainer: \$ 40 mion;
- Aeropuerto Internashonal di Boneiru: \$ 60 mion;
- Alohamentu pa enseñansa: \$ 75 mion;
- Konstrukshon di bibienda sosial: \$ 125 mion;
- Karetera: \$ 200 mion, repartí riba un kantidat di aña;
- Edifisio gubernamental: \$ 40 mion;
- Plannan pa hasi WEB duradero: \$ 60 mion;
- Hospital: \$ 50 mion;
- Naturalesa i medioambiente: \$50 mion.



#HUNTU

Esaki ta un oportunitat úniko pa Boneiru pa krea sektornan ekonómiko nobo. Eksigiendo e rekisitonan korekto pa e invershonnan akí, nos por garantisá ku na Boneiru nos por bira un sentro di konosementu pa e region, i den algun kaso posiblemente un prekursor. Pa MPB ta importante pa garantisá ku e plaka invertí pa gran parti ta keda aki riba e isla. P'esei nos lo formulá un manejo di invershon pa e invershonnan grandi akí ku lo promové esaki. Nos por logra esaki solamente formulando un vishon ku pueblo ta apoyá den estrecho kooperashon ku instansianan na Boneiru i na Hulanda.

MPB ta kere ku gobièrnu lokal mester komprometé su mes hasiendo invershonnan supstansial pa alsa kalidat di turismo i di ekonomia en general, di manera ku por ofresé e trahadónan den e sektor akí mas. Pa e motibu ei ta mas ku lógiko pa promé ku Boneiru hasi e invershonnan ei, sektor privá den e ramo akí komprometé su mes pa oumentá e suèldunan i ofresé mihó kondishonnan laboral sekundario, manera sigur un penshun di kompania tambe.

Produkshon lokal

Boneiru konosé un historia largu pa loke ta trata agrikultura, krio di bestia i peska. Desde 2019 MPB, komo partisipante den gobernashon, a invertí konsientemente den aktivashon di LVV i a krea insentivonan pas sostené kunukeronan lokal i di e forma ei stimulá produkshon lokal. Esaki ta kuadra ku nos vishon di un ekonomia duradero i ta krea mas oportunitat pa invershonistanan pa mehorá nan produkshon i hasié rendabel. Produkshon lokal a krese i nos ta mira mas i mas kuminda produsí lokalmente den tiendanan. Nos a tuma stapan brindando programanan di coaching pa empresarionan riba tereno di agrikultura, uso di solushonnan inovativo manera 'hydroponics', i posibilidat pa empresarionan praktiká agrikultura i krio di bestia riba tereno di LVV. Esaki no ta solamente bon pa empleo, e ta mas saludabel tambe pa nos tur i ta kontribuí na durabilidad i garantia di kuminda.

Tòg Boneiru ta hopi dependiente ainda di importashon di kuminda. Sigui desaroyá agrikultura, krio di bestia i peska mas komo sektor ekonómiko ta un prioridat. P'esei mas i mas a pone rekurso disponibel pa programanan pa sigui stimulá e sektor akí.

INOVASHON, KONOSEMENTU I INDUSTRIA KREATIVO

MPB ta kere ku Boneiru su futuro ta riba tereno di inovashon. Boneiru por ta esun ku ta marka pouta riba tereno di bienestar, durabilidad, naturalesa i kultura i servisio, fasilidatnan moderno i kapasidat empresarial inovativo. Bonerianonan ta kreativo i talentoso, ku enorme potensial. Nos ta mira un Boneiru nos dilanti kaminda tur siudadano tin oportunitat hustu pa kombertí nan talento den kapasidat empresarial eksitoso.

Industria kreativo ta un manera pa diversifiká nos ekonomia i prepará Boneiru pa futuro. Bou di industria kreativo nos no ta referí solamente na artistanan manera pintor òf músiko, pero tambe personanan kreativo ku ta dediká na teknologia. Ku apertura di e 'business incubator' a dal un promé stap pa stimulá prinsipiantenan den e industria kreativo i asina pone mas posibilidat pa entrenamentu i finansiamentu na nan disposishon.

PRIORIDATNAN PA DESAROYO EKONÓMIKO DURADERO

Kapasidat empresarial

1. Hasi uso di e investigashon di 'Carrying Capacity' di Banko Mundial komo base pa sigui desaroyá e isla;
2. Pone rekursonan disponibel pa programanan pa stimulá produkshon lokal;
3. Mas business incubators;
4. Leinan di imigrashon balansá i hustu
5. Prosesamentu mas rápido di pèrmitnan di trabou;
6. Stimulá industrianan inovativo i kreativo komo aktividatnan ekonómiko nobo;
7. Mas oportunitat pa empresarionan establese lokalmente pa medio di mas i mihó posibilidat pa finansiamentu empresarial;
8. Deskurashá kompetensia inhustu for di pafó;
9. Imponé moratorio den kaso ku tin un oferta di mas di sierto empresa;
10. Prevení desaroyonan indeseá;
11. Keda sigui hasi esfuerso pa empresarionan na Boneiru i ekonomia di Boneiru por hasi uso di e mes fasilidatnan di sosten pa empresario i desaroyo ekonómiko ku tin na Hulanda Oropeo;
12. Desanimá invershonistanan grandi ku tiki òf ku no tin laso ku Boneiru;
13. Keda ku atenshon pa e modelo di generá entrada pa empresarionan boneriano.

Turismo di kalidat

1. Un desaroyo ekonómiko balansá ku énfasis riba partisipashon di e poblashon lokal i turista ku ta gasta mas pa dia, di manera ku prosperidat ekonómiko ta resultá den bienestar pa famia- i kasnan di famia;
2. Promové turismo di kalidat pa drecha fasilidatnan laboral den e sektor.
3. Laga nos kultura ta mas parti di e produkto turístiko;
4. prevení desaroyo indeseá i eksesivo;
5. crowd management.

Produkshon lokal

1. Sigui ku programanan di invershon pa agrikultura, hortikultura, krio di bestia i peska;
2. Sigui posishoná Boneiru komo esun ku ta kana dilanti riba tereno di maneho i desaroyo di naturalesa.

Habitantenan sentral

1. Invertí den oumentu di kalidat di nos produkto ekonómiko, basá riba kompromiso di e sektor pa tin mihó kondishonnan laboral primario i sekundario;
2. Un oferta kontinuo di entrenamentu i formashon, supsidiá òf no, pa e poblashon lokal;
3. Programa pa motivá studiantenan ku ta studiando den eksterior pa regresá e isla i hasi esaki atraktivo;

4. Maneho di destaho pa invershonnan semi píbliko ku un rendimentu mas haltu (finansiero i di konosementu) pa Boneiru (prevenshon di fuga di kapital).





MPB ta konsiderá union di forsa den e sektor kultural i artístiko pa fortalésé organisashonnan **importante i kier profesionalisá i mehorá e maneho di subsidio ku mas rekurso pa arte**, kultura i historia. Nos identidat ta konektá ku nos kultura. **Kultura i arte** mester haña mas atenshon den nos enseñansa i hunga un papel mas grandi den nos ekonomia. Nos ta di opinion papiamentu ta un parti importante di esaki. **Turismo ta ofresé nos hopi posibilidat pa ekshibi i duna apresio na nos identidat**, kultura i arte outéntiko i generá entrada pa e isla.

MANTENSHON DI IDENTIDAT I BALORASHON DI KULTURA

MPB ta orguyoso di e identidat boneriano, den kua nos ta stima nos próhimo i nos ta traha huntu. Tresiendo hende mas serka otro nos kier promové konekshon mutuo i kompreshon pa otro. **Awor ku gobièrnu ta generá mas entrada, tin mas rekurso disponibel pa invertí den ekspreshon kultural i folklórico**. Nos por fortalésé i hasi nos ekspreshon kultural mas sostenibel, apoyando nos organisashonnan kultural i promoviendo nan kolaborashon mutuo.

Kresemantu di poblashon

Nos komunidad ta riku na diferente nashonalidat ku histórikamente ta biba den harmonia pasífiko ku otro. Mayoría hende a bin pa yuda Boneiru sigui desaroyá a base di nan konosementu, eksperensia i kontribushon. Awor ku e fluho di entrada ta mas grandi, MPB kier pa manehá esaki bon, pa e no funshoná na un manera ku ta destabilisá nos komunidad. MPB ta aserká esaki ku un maneho ku ta funshoná bon, den kua integrashon ku ta kuadra den i identidat di Boneiru ta importante

Nos a kuminsá revisá legislashon pa dirigí imigrashon den bon direkshon i kaminda ta nesesario, frena esaki. **A base di un investigashon di Carrying Capacity den kooperashon ku Banko Mundial**, a analisá nos maneho di migrashon i kon nos por regulé mihó. Por ehèmpel nos por mara estableimentu riba Boneiru na kondishonnan di integrashon, i duna habitantenan ku raisnan fuerte na Boneiru preferensia pa kumpra kas, pa medio di un ordenansa di bibienda.

Lamentablemente nos ta mira ku e aktitutnan ta eskalando i ku e distansia entre gruponan di poblashon ta birando mas i mas grandi. **Nos kier promové mihó koheshon sosial i mas union kreando mas área pa rekreá, organisá aktividatnan den sentronan di barío, di manera ku tur grupo di poblashon por topa otro, bin ku kampañanan di formashon i konsientisashon**, mihó mantenshon di reglanan i por ehèmpel prepará e bonerianonan nobo poniendo komo kondishon/eksigensia pa integrashon, un nivel básiko di papiamentu den sierto sektornan

Durante e periodo di gobernashon ku a transkurí nos a laga hasi un investigashon tokante e situashon di idioma na Boneiru i a laga ekspertonan di Universidat di Aruba traha un nota di maneho basá riba esei. **Riba esaki nos ta basa nos prioridatnan pa e maneho di idioma pa Boneiru pa e añanan benidero**. Pa Boneiru nos kier un maneho di idioma realístiko, basá riba deseonan nos pueblo. Tradishonalmente nos ta naturalmente un komunidad den kua ta papia diferente idioma, pero nos ta kere ku ta hopi importante pa nos keda duna balor na papiamentu (papiamentu komo lenga materno), **i pa personanan ku ta dominá solamente papiamentu bon, por partisipá plenamente den nos komunidad**. Esnan ku kaba di yega mester adaptá na mes siñando e idioma i partisipando na aktividatnan edukativo i kultural dirigí riba integrashon, partikularmente relashoná ku rekonosementu i apresio di **papiamentu** komo **idioma matris**. Pa enseñansa esaki ta nifiká, ku nos mester bandoná e idea di un solo idioma di instrukshon i duna alumnonan oportunitat pa usa e idioma nan tambe ku nan ta dominá mas mihó den enseñansa.

Nos kier introdusí komo kondishon, ku promé ku un persona por inskribí su mes komo habitante di Boneiru, e mester pasa un eksámen di papiamentu básiko ku éksito.

“ Nos identidat ta konektá ku nos kultura. ”

Amancio Batta



PRIORITEITEN BEHOUD VAN IDENTITEIT EN KOESTERING VAN DE CULTUUR

Ban papiá
PAPIAMENTU!

Nos identidat
kultura

Maneho di idioma

1. Mester rekonosé Papiamentu komo idioma ofisial den e Karta oropeo pa idiomaan regional i di minoria;
2. Enseñansa na hulandes mester por tuma lugá komo 'idioma estranhero';
3. Eksámen di papiamentu básiko komo eksigensia pa registrashon na Boneiru;
4. Nivel básiko di papiamentu komo kondishon pa nombramentu pa ámtenar i dosente;
5. Fasilitá Fundashon Akademia Papiamentu di manera ku e por sigui desaroyá i implementá e maneho di idioma, start un kampana di informashon i sigui duna kontenido na e maneho di enseñansa den konsulta ku e ministerio.

Maneho di museo


1. Promové kooperashon entre e diferente museonan;
2. Amplia i profeshonalisá maneho di supsidio pa museonan.

Kultura na skol

1. Un lugá mas prominente pa nos kultura na nos skolnan.

Maneho di kultura

1. Desaroyá biblioteka den un sentro di konosementu inovativo i kultura;
2. Inkorporá sektor kultural den entre otro sektor turístiko, di manera ku artistanan kultural por gana un entrada digno ku esaki;
3. Trese organisashonnan kultural huntu pa fortalese nan i konservá nos identidat i pa promové kultura.





PROTEKSHON DI NATURALES

Pèrdida di naturalesa ta un preokupashon rònt mundu. Den e último 50 añanan biodiversidat global a baha ku mas òf **ménos 70%**. Afortunadamente Boneiru ta un prekursor riba tereno di protekshon di naturalesa. Komo komunidad nos ta orguyoso di nos organisashonnan di naturalesa lokal, ku ta traha ku pashon riba esaki. Esei ta konta tambe pa nos piskadó i kunukeronan tradishonal, ku **tradishonalmente ta biba den balansa ku naturalesa i ta tras pasá konosementu balioso di nos paisahe, mata i animalnan na generashonnan hóben.**

Kalidat di naturalesa na Boneiru ta importante pa nos ekonomia i ta forma parti di nos kultura. **E ta den nos naturalesa.** MPB kier protehá i restorá nos ambiente natural proaktivamente. Pa hasi esei nos mester identifiká i atendé ku e retonan.

Den e último añanan Boneiru a bira popular pa invershonistanan ku kier realisá proyektonan di konstrukshon grandi. Pero no ta deseabel pa bai di akuerdo sin mas ku tur plan di konstrukshon, sin ku gobièrnu inventarisá mihó kiko e konsekuensianan ta pa naturalesa i interesnan di e isla. **MPB ya a krea kondishonnan mas estrikto pa desaroyadónan di proyekto i invershonistanan grandi ku kier forma parti di nos ekonomia, i di nos lugá di biba tambe.** Nos kier i por pone eksigensianan mas haltu. Hasiendo esei nos ta atraé invershonistanan sosialmente responsabel ku hustamente kier yuda Boneiru sigui avansá den e vishon pa un futuro sostenibel.

Ademas tin mas i mas informashon disponibel tokante e efektonan di klima na Boneiru. Pensa por ehèmpel riba mas sekura i molèster di awa pa motibu di kondishonnan di

tempu ekstremo. Na su turno esei ta forma un peliger pa hende, karetera i edifisio. Un parti di e kontesta ta tin áreanan di naturalesa saludabel. **Pasobra invertí den naturalesa, ta invertí den adaptashon di klima.** MPB ta kere ku ta importante pa kuminsá tuma medidanan di adaptashon awe.

Desaroyonan den konstrukshon, kresementu di poblashon i kambio di klima ta rekerí un kambio den e manera ku nos ta pensa tokante naturalesa i maneho ambiental. **Tin mester di por ehèmpel integrashon fundamental entre naturalesa i infrastruktura, manera sistemanan di maneho di awa riba henter e isla i espasionan bèrdè den Kralendijk i Rincon. Mas aleu a reservá fondo pa kumpra plantashi Fontein, ku tin un balor di paisahe grandi pa tantu naturalesa komo kultura.** Pa loke ta trata MPB, mester embolbí naturalesa mas mihó den planifikashon di tereno. P'esei nos a formulá algun kondishon esensial den nos vishon pa e plan di desaroyo di tereno, **ku tin di protehá nos naturalesa i patrimonio kultural.** Pa esaki nos lo tene nos kresementu di poblashon bon na bista i huntu nos lo determiná kon rápido i te kon leu nos kier krese.

E retonan tokante naturalesa i klima ta kompleho. Un strategia di término largu i kolaborashon entre organisashonnan sosial i gobièrnu ta esensial. Meskos ku nos a hasi esfuerso pa aseptá e **mohon pa prohibí kremanan protektonan kontra solo ku ta dañino pa koral i uso di plèstik desechabel,** e añanan benidero nos lo enfoká riba un aserkamentu integral pa protekshon di naturalesa pa henter e isla. Esei lo nifiká tambe ku nos lo analisá bon e entradanan di kobransa di naturalesa i e efektividat di finansiamentu i ehekushon di e tareanan di maneho di naturalesa.

Por midi sivilisashon di un komunidad na e manera ku e ta anda ku bestia. MPB ta di akuerdo ku e ekspreshon aki di Mahatma Gandhi i e último añanan a sostené diferente iniciativa na bienestar di bestia, i lo sigui hasi esaki. E periodo di gobernashon benidero nos lo sigui ku e programa di bienestar di bestia.

“ Prevení ta mihó ku kura; p'esei awor aki e enfoke mester ta riba konservashon di e biodiversidat spesial i skars di nos isla; riba i bou di awa. ”

Nina Kwakman.



“ Pa medio di prevenshon, edukashon i mantenshon, nos ke sigui traha huntu pa bienestar di animal na Boneiru. ”

Sanne Meijer



PRIORIDATNAN PA PROTEKSHON DI NATURALES



Maneho pa protekshon di naturalesa

- Edukashon tokante konservashon di naturalesa na skol, den turismo i pa empresanan;
- Evaluashon di struktura i finansiamentu di diferente organisashon enkargá ku protekshon di naturalesa, pa promové kolaborashon i pa logra tur meta riba e área akí.

Plan pa desaroyo di tereno/Plan Maestro Boneiru

- Hasi eskoho relashoná ku kresementu di poblashon relashoná ku konservashon di naturalesa.

Bienestar di animal

- Sigui ku e programa di bienestar di animal.

#HUNTU

OPORTUNIDAT DI ENSEÑANSA AMPLIO PA TUR HENDE

Formashon di un hende na medida haltu, ta desisivo pa su bienestar i éksito den bida. Kada persona ta úniko. Bo no por spera di un piská ku e ta siña subi palu. Pa e motibu akí nos ta haña enseñansa na midí importante: enseñansa i formashon dirigi riba desaroyo di e hende.

MPB ta boga pa 'life long learning – siña un bida largu', oportunidad pa por keda desaroyá bo bida largu tantu personal komo profeshonal. Esaki ta importante pa tur hende, sigur den e mundu akí ku ta kambiando kada dia mas rápidamente i spesífikamente ora ku bo ke alkansá manera MPB un Boneiru fuerte i duradero. Formashon ta tuma lugá den henter nos komunidad; **na kas, na skol, den barío, na un klup, huntu ku amigunan i na trabou**. Un trayekto di bon formashon pa tur hende na Boneiru no ta yuda nos solamente na trabounan mihó pagá, e ta yuda tambe protehé e identidat boneriano, e siñamentu di norma ku balor, konosementu i abilidad i loke ta nifiká pa ta un habitante di Boneiru.

Formashon pa ekxelensia ta e instrumento pa medio di kua un komunidad por desaroyá su mes den bon direkshon. Pa e motibu akí ta hopi importante pa sinkronisá entre sektor komersial i **enseñansa na kua konosementu i abilidad tin nesesidat riba merkado laboral**. Esaki preferiblemente nos ta hasi a base di disponibilidad di bon sifranan di merkado laboral. Nos ta mira un papel importante den esaki pa Plenchi di Trabou.

En todo kaso nos ta mira tambe ku awor kaba tin un nesesidat grandi na mas enseñansa enfoká riba práktika pa profeshonnan spesífiko i diverso profeshon den sektor turístiko. **Den e periodo binidero nos ta bai promové fundashon di un skol di práktika** kaminda por sigui siña e abilidadnan práktiko di e profeshonnan akí.

Den life long learning/siña un bida largu, ta pertenesé tambe programanan di akohida despues di skol kaminda ta ofresé hóbennan por ehèmpel kurso teknológiko, 'life skills' i '21st century skills programs'. Ku esakinan nos ta kubri dos meta. **Nos ta duna e hóbennan despues di skol, den nan tempu liber, oportunidad pa hasi aktividat, ku pa nan ta interesante i na mes momentu, nos ta prepará nan pa futuro**. Esaki ta posibel tambe pa medio di lès di baile, deporte, seshonnan kreativo òf te hasta preparashon pa un funshon den sektor públiko, dependiente di loke un persona mes ta haña interesante.

Un bon sentro di konosementu kultural i biblioteka ku ta sinkronisá riba e pedida for di merkado, ta yuda pa hisa e kalidat di formashon i ta krea atrakshon pa e hóbennan di Boneiru pa regresá nan isla pa kontribuí na desaroyo. **Pa profesionalisá nos biblioteka, den kurso di e añanan tras di lomba kaba nos por a duna, den koperashon estrecho ku e ministerio konserní, un promé impulso na mehoransa di e kolekshon i awor nos ta traha na un plan di manejo pa mas aña di biblioteka. Den esaki e realisashon di koperashon den un ret di kontakto di biblioteka ta poné na haltu riba agènda**. Den kuadro di e strategia integral ku MPB ta boga pe, nos ta haña importante ku ta hasi e koperashon entre e organisashonnan di trabou sosial, enseñansa i e sektor di kultura mas intensivo. Nos ta mira pa e biblioteka un papel hopi importante pa duna e koperashon akí mas forma, pa por duna tur habitante aksesu na e konosementu ku nan ta buska, i pa fungi komo un community center pa tur nos habitantenan. E biblioteka por tin un **papel krusial komo sentro di konosementu pa konsientisashon, formashon di identidat** i rekuperashon di e efekto di e pasado di sklabitut kompartí. Nos ta pensa den esaki na un konekshon entre fundashon Fuhikubo na Boneiru, Archivo Nashonal i e futuro Slavernijmuseum na Amsterdam.

#HUNTU



PRIORIDATNAN PA OPORTUNIDAT DI ENSEÑANSA PA TUR HENDE



Kontinuashon di mehoransa di aktual enseñansa:

- Mas dosente i coaching pa dosente;
- curriculum di skol adaptá na konteksto i kultura boneriano;
- enseñansa enfoká riba iniciativa empresarial;
- étika laboral i abilidadnan sosial riba curriculum;
- introdukshon di un skol di práktika (manera pa karpinté, mètslá, lasdó, formashon di horeca).
- Desaroyo personal i di liderazgo na skolnan;
- Materia abilidad empresarial na skol;
- Adaptá struktura di enseñansa, mas enseñansa na midí i enfoká riba desaroyo di hende.

Mihó konekshon di enseñansa práktiko i demanda riba merkado laboral

- Profundisá e papel di Plenchi di Trabou.

Life long learning (siña un bida largu)

- Desaroyo kontinuo riba tantu tereno personal komo tereno profeshonal enfoká riba situashon personal, entre otro sosten den kaso di alfabetisashon i duna kurso i formashon pa personanan ku ta buska trabou;
- Mas oferta di formashon práktiko i tékniko (básiko). pa adulto tambe;

- Plan di formashon konsistente den koperashon ku stakeholdernan di Boneiru;
- Introdukshon di programanan despues di skol, manera kurso teknológiko i '21st century skill programs';
- Ekipá un bon biblioteka moderno;
 - Impulso kualitativo riba tereno di duna servisio, funshoná komo community centrum i komo sentro di konosementu.
 - Esaki nos ta bai realisá ku mas intensivashon di kolaborashon entre e diferente organisashonnan di bienestar na Boneiru, i partnernan na Hulanda Oropeo;
 - impulso di kalidat riba tereno di bibienda: sentral, sitio ku bon konekshon ku ta ekipá ku tur fasili dat ku ta nesesario pa e papel importante ku biblioteka tin den nos komunidad. Pa e meta akí tin kaba un montante di \$3,7 mion reservá komo invershon di parti di EPB.
- Funda un sentro di investigashon ku ta konektá riba e demanda i inovashon for di sektor privá;
- Promové programanan di formashon pa adulto, spesífikamente riba tereno di profeshonnan práktiko i tékniko, ku oportunitat mas haltu di éksito i partisipashon den komunidad.



DISPONIBILIDAT DI DEPORTE, SALUBRIDAT I KUIDO PA TUR HABITANTE

Salubridat

Den e añanan tras di lomba a realisá hopi progreso riba tereno di kuido i salubridat na Boneiru. Sinembargo nos ta distinguí hopi punto di mehorashon pa e kalidat di servisio den kuido. Pa e motibu akí nos ta keda mustra serka e ministerionan responsabel kiko por ta e konsekuensianan di sierto desishonnan di maneho i huntu ku nan lo sigui traha na un solushon di esaki. Ta asina ku aktualmente tin por ehèmpel hopi spesialisista i dòkter ku ta bini Boneiru temporalmente pa algun luna, pa despues nan kambia puesto ku un otro. **Hopi biaha tratamentu di un malesa ta un proseso di aña largu anto nèt pa e kasonan akí ta un preshon èkstra pa kada par di luna mester atendé ku un spesialisista nobo.** Na e persona nobo akí bo mester bai konta di nobo bo historia i bo mester bai krea atrobe un relashon di konfiansa. Netamente den un periodo asina difísil continuidad di un dunadó di kuido ta un faktor di alivio. Banda di esei por ehèmpel dor di e seguro di malesa ta frustra e derecho riba un second opinion.

Kas di Kuido

E úniko kas di kuido na Boneiru ta Kas di Kuido, ku ta kai bou di Fundashon Mariadal. Di un investigashon resien a resultá ku denter di e organisashon akí tòg tin muchu tiki atenshon pa e kas di kuido akí i ku e enfoke ta konsentrá mas riba e kuido médiko denter di Mariadal. E kuido ku ta duna no ta kumpli ku e kuadro di rekisito di kalidat di servisio di kas di kuido ku na Hulanda Oropeo ta e standart. **En bèrdat e habitantenan ta haña bon kuido médiko, pero e habitantenan apénas ta kana òf move. Pa MPB ta importante ku ta trese kambio den esaki.** Den e próksimo periodo di gobernashon nos ke, huntu ku esunnan responsabel, traha un plan di mehorashon i fasilitá esaki.

Di un investigashon resien a resultá ku denter di e organisashon akí tòg tin muchu tiki atenshon pa e kas di kuido akí i ku e enfoke ta konsentrá mas riba e kuido médiko denter di Mariadal.

Shellany Sebelon



Kuido di Grandinan

MPB ta sostené e meta pa kuido di grandinan, ku nos a stipulá den e aktual periodo di gobernashon: “na Boneiru bo ta bira grandi di **forma vital**, bo ta konta komo habitante séniør komo un miembro apresiá di komunidad, bo ta risibí kuido adekuaado ku ta fasilitá bo pa biba na kas den bo propio ambiente i bo ta mantené mas tantu posibel direkshon di bo propio bida. **E maneho ku kua nos por realisá esaki nos komo EPB mester konsipiá i ehekutá den koperashon ku e ministerio konserní.** EPB ta responsabel den esaki responsabilidadat ku kasonan manera estilo saludabel di biba, bakunashon i kombatimentu di infekshon, e bienestar di grandinan, manera sostené dunadónan di kuido den seno sosial, promoshon di kontakto sosial i un oferta di aktividat aksesibel den barionan. **E próksimo temporada di gobernashon MPB ke usa pa instalá i sigui amplia algun prekondishon, manera nos ta nombra akibou den e puntunan di prioridat.**



Personanan ku limitashon

Mester drecha e aksesibilidadat di persona ku limitashon na Boneiru tantu pa habitante komo pa bishitante. Den e próksimo periodo di gobernashon MPB ke atendé ku esaki fuertemente i drenta den diálogo ku organisashonnan, **habitantenan i sektor turístiko pa por yega na un plan sólido di akshon i ehekushon mas pronto posibel.**

DEPORTE

#HUNTU

A hasi invershon grandi pa renobá terenonan di deporte na Boneiru den periodo di gobernashon tras di lomba. E Ministerio di VWS huntu ku EPB a reservá montantenan substansial pa realisá esaki. Den e próksimo periodo di gobernashon nos ke kontinuá ku e desaroyo akí i tambe realisá algun tereno di deporte chikitu den e barionan.



MPB a inisiá e proyekto di un sirkuito di drag pa amantenan di pustamentu di vehíkulo di karera i a pone spit tras di esaki ku reservashon di fondo pa esaki den e presupuesto di 2022 i 2023 di EPB. Ainda mester realisá e proyekto akí.

MPB ta haña kolaborashon importante, tambe riba e área di deporte. Pa e motibu akí nos ta stimulá e koperashon entre e diferente bòntnan i klupnan na Boneiru, pero tambe kolaborashon ku bòntnan i klupnan den restu di mundu.

PRIORIDATNAN DI DISPONIBILIDAT DI DEPORTE, SALUBRIDAT I KUIDO PA TUR HABITANTE



Kuido di salubridat

- Realisá mas kontinuidat den okupashon di personal ku dòkter di kas i spesialisista médikonan den konsulta ku e partidonan konserní (ministerionan i hospitalnan i asegurado). E partidonan den e kadena di kuido mester kolaborá mas ku otro. Nombra mentu di un kwartiermaker di kuido dor di EPB, VWS i Mariadal pa promové e kolaborashon entre e partidonan i pa atendé ku e puntonan di problema;
- Sigui influensia e situashon akí dor di trese nan na atenshon di e ministerio konserní, huntu ku otro organisashonnan;
- Plan di mehorashon i pronto ehekushon di mehorashon mas tantu di aksesibilidat di Boneiru pa persona ku limitashon;
- Promové Nutrishon saludabel i moveshon bou di poblashon;
- Konsipiá plan di mehorashon huntu ku organisashonnan embolbí;
- Fasilitá i invertí den konstrukshon di un Kas di Kuido nobo.

Kuido di Grandinan

- Realisashon di un base di sosten mantelzorg;
- Fasilitá kuido di respaldo (respit zorg) pa kuido familiar (mantelzorg) i sosten na midí na kas;
- Un kas di kuido di kalidat haltu pa un estadia agradabel i bon kuido;
- Ekspandé desaroyo di Aksesio den e tópiko akí komo un solo portal pa e tópiko akí pa tur pregunta i medida riba tereno di kuido di grandinan;
- Implementashon di e plan di maneho nashonal Boneiru pa kuido di demensia;
- Realisashon di oferta di moveshon dor di un koperashon di Indebon ku organisashonnan di kuido;
- Sigui konsipiá un plan di prevenshon di kaimentu;
- Sigui desaroyá investigashon di poblashon;
- Duna atenshon na kas pa seniòr den e Ruimtelijk Ontwikkelingsplan Bonaire;

Deporte

- Realisá sirkuito di drag;
- Mas área di rekreashon i tereno di deporte pa famia i hóben;
- Mas kolaborashon i koheshon entre e diferente organisashonnan di deporte.

INFRASTRUKTURA BON MANTENÉ I SAFE

#HUNTU

A deskuidá e kamindanan di Boneiru pa desenanan largu. Den e añanan tras di lomba a duna atenshon na drecha e kamindanan mas usá i situashonnan urgente. E tarea pa pone e infrastruktura di **kareteranan na Boneiru sólido i safe** no ta trabou pa realisá den un par di año. Ademas e solushon pa e retonan akí no ta limitá na solamente 'drecha kaminda'.

Ta eksigí un solushon **strukturnal i tumamentu di eskohonan importante** ku awor i den futuro ta bai **hasi un impakto positivo riba** nos. Base pa esaki ta e Ruimtelijk Ontwikkelingsplan Bonaire (ROB). Den e temporada di gobernashon ku a pasa a traha duru riba aktualisá e ROB. Akiden ta inkorporá traha kaminda i drechamentu di kaminda, seguridat pa tur partisipante den tráfiko i trahamentu di suficiente lugá di parkeo. **Tambe desishonnan manera e sitio pa un haf, ekspanshon di aeropuerto, desaroyo di áreanan i otro trabounan di infrastruktura ta inkorporá akiden. Organisá un bon transporte públiko, inkluso aksesibilidat pa persona ku limitashon, ta meresé prioridat. E próksimo añanan MPB ke invertí den drechamentu i mantenshon aselerá di kamindanan, ku fluho di tráfiko mehorá i vianan apropiá pa kana i kore baiskel den kuadro di tráfiko safe. Akiden tambe ta inkorporá e integrashon di parkeo i aksesibilidat pa personanan ku limitashon.**

Ku habrimentu di dos planta di asfalt nobo i di un fábrika di klenku, nos por sòru ku ta **desaroyá nos infrastruktura mas rápidamente**. Pa término largu nos tin mester di un bon plan di mantenshon pa nos infrastruktura. Esaki nos ke sigui traha riba den e próksimo periodo di gobernashon.

E maneho di tereno pa Boneiru mientrastantu ta stipulá, di manera ku den e próksimo temporada di gobernashon por bai sigui elaborá riba esaki. **Den esaki nos ta pensa riba asuntunan di entrega di tereno, den kua Gobièrnu no ta bai entregá mas su propio tereno na partidonan ku no ta òf kasi no ta laga entrada di eksplotashon di e tereno duna benefisio na e habitantenan di Boneiru.** Den esaki digitalisashon di e sistema ta un desaroyo importante. Nos ke netamente kapasitá nos siudadanonan i komersiantenan establese pa traha un kas òf edificio pa empresa.

Banda di esaki a instituí un moratorio temporal riba **konstrukshon di hotèl i di konstrukshon pa hürmentu rekreativo**. A stipulá kriterio pa hotèl i akomodashonnan, di manera ku proyektonan di konstrukshon nobo ta pas denter di nos vishon pa turismo na Boneiru. No mag traha mas hotèlnan nobo por ehèmpel komo apartamento individual pa bende, pero solamente komo un konstrukshon total ku no por parti, di manera ku ta evitá spekulashon di bien inmóbil. **Un otro aspekto ta kontrol i supervishon riba hürmentu di kas pa término kòrtiku i rekreativo den áreanan kaminda esaki no ta permití.** EPB a manda un karta kaba tokante esaki pa doñonan di kas. Mas kontrol di esaki ta nesesario. Ku esaki e oferta di kas pa hür pa término largu ta bira mas grandi.




MPB
Movimentu di
Pueblo Boneriano

PRIORIDATNAN INFRASTRUKTURA BON MANTENÉ I SAFE

Ruimtelijk Ontwikkelingsplan Bonaire


- Stipulá e ROB nobo i un vishon pa un desaroyo ordená di Boneiru;
- Desaroyo di barío ku núkleo kaminda hende ta bini huntu pa hasi kompra, pa rekreashon i hasi deporte. Sòru pa kaya adekuá trahá ku klenku den e barionan.
- Mas kas sosial den koperashon ku Hulanda;
- Parselashon i ponementu disponibel di tereno erfpacht pa famianan por traha nan mes kas pero tambe pa konstrukshon pa empresa.
- Desaroyo di área di rekreashon i tereno di deporte pa famia i hóben;
- Instituí kriterio pa hotèl i akomodashon i e rekisitonan mará na esaki

Invershonnán den e aña binidero

- Kontinuashon di proyektonan pa konstrukshon di un haf di kòntainer;
- Ekspanshon i modernisashon di Bonaire International Airport;
- Eksplotashon di tereno den man di Boneiru;
- Invershonnán den konstrukshon, drechamentu i mantenshon di e ret di kaminda públiko ku mas seguridat den tráfiiko i fasilidatnan pa peaton i siklista i un bon fluho di tráfiiko;
- Kontinuá ku invershon i realisashon di sirkuito di drag;

Transporte Públiko

- Realisá un bon sistema di transporte públiko ku ta konfiabel i pagabel, ku esaki ta promové seguridat, fluho liber di tráfiiko i aksesibilidat di e kamindanan.



FINANSA SALUDABEL I UN GOBERNASHON TRANSPARENTE I ÍNTEGRO



ENTRADANAN PRESUPUESTO

INCREMENTO:
\$25 Mion (53%)



Un bon gobernashon ta un kondishon fundamental pa e desaroyo duradero di Boneiru deseá. Pa e motibu akí MPB ta haña esaki un punto di atenshon importante, tambe pa e próksimo periodo di gobernashon. Den e periodo di gobernashon tras di lomba nos a pone pasonan riba tereno di revitalisashon di e aparato di empleado, di manera ku nos por sirbi komunidad na un forma hustu, efisiente i efikas. Lamentablemente EPB (**Entidad Públiko Bonaire**) ta konfrontá problemanan idéntiko riba merkado laboral ku e empresarionan ta konfrontá den haña empleado kualifiká. Nos ta konvensí ku, si nos sigui riba e ruta ku a skohe, EPB lo por bira mas tantu un dunadó di trabou atraktivo.

Banda di esaki nos a dediká hopi atenshon na mehorashon di finansa di EPB. **E entradanan riba presupuesto a subi ku kasi 50% (\$47 mion na 2019 a subi te na \$72 mion den 2023).** Ku esaki EPB por hasi muchu mas pa komunidad. Den e próksimo periodo di gobernashon **nos lo sigui riba e rumbo akí. Nos ta spera ku pa aña 2022 pa di promé biaha nos lo haña un deklarashon di aprobashon di parti di akountent pa e presupuesto anual.**

Boneiru tin 10 kompania NV di Gobièrnu i algun fundashon di Gobièrnu, huntu nan ta e asina yamá partisipashonnan. **E kompanianan akí ta krusial pa Boneiru i nan ta mantené servisionan importante: koriente, awa, telefonia, prosesamente di sushi, un aeropuerto i hopi mas.** E akshonnan ta den poder di e Entidad Públiko. Pa por garantisá e futuro di e servisionan na e habitantenan ta importante pa tin partisipashonnan stabil. **E akshonista den esaki tin un responsabilidat importante.** E añanan tras di lomba a traha duru pa pone e base di e maneho di akshonista na órden. Di e manera akí pa tur hende ta transparente loke e akshonista ta spera di e partisipashon (kompania). E próksimo kuater aña nos ta sigui traha riba esaki.

EPB for di 2020 ta traha pa realisá su maneho tokante e partisipashonnan i hasi esaki segun e prinsipianan di good governance. E reportahe di investigashon di crmLiNK ku a traha den koperashon ku e Ministerio di Asuntu Interno, a duna hopi rekomendashon. Un parti importante di esaki ta 'pone e base na órden'. **Di e manera akí nos ke anda mihó ku e interesnan públiko di e partisipashonnan (kompanianan), di manera ku e habitantenan i empresanan na Boneiru por keda hasi uso optimalmente di e facilidatnan importante akí. Un gran parti di e rekomendashonnan ta ehekutá kaba mientrastantu.** A start un proseso nobo pa reclutá direktorado i Konseho di Komisario. Tur hende por solisitá segun e base di un perfil i aviso. A stipulá ku reclutashon públiko di kandidato ta e norma i ku e preferensia ta pa haña kandidato for di region.





Riba tereno sosioekonómiko, Boneiru ta sigui konfrontá reto grandi. Tin hopi boneriano ta biba bou di e márgen di pobresa.

Na Boneiru nos tin un sifra di desempleio abou, pero tin trabou no ta garantia na Boneiru ku bo por paga bo kuantanan.

Debby Rauwers

E diseño di e perfilnan di kasi tur e partisipashonnan ta aktual di manera ku un mihó selekshon por tuma lugá ku un oumentu di e kalidat di e kandidatonan. E promé partisipashonnan tin tambe statutonan aktualisá (p.e. BIA NV). A tuma pasonan pa yena tur e funshonnan klave i pa kompletá e konsehonan di supervishon di komisarionan, **ku funshonarionan kualifiká**. A stipulá un maneho di rekompensa ku un montante máksimo di salario pa miembronan di direktiva i miembronan di supervishon. **Alabes a forma kuadro pa un maneho di dividènt**. Mientrastantu a presentá un konsepto nobo di Code Corporate Governance na Konseho Insular. Alabes a eliminá pa un parti e retraso di kuenta anualnan di e partisipashonnan. Solamente e kompanianan yu di BHM NV ta kana tras ainda. **Mientrastantu tin un kuadro transparente di ehkushon kon e akshonista ta atendé ku su responsabilidatnan komo akshonista**. Ademas a tene diverso reunion ku e partisipashonnan i fundashonnan. **E último tabata na novèmber 2022 kaminda e partisipashonnan a duna kòmplimènt** kon e akshonista a bira mas visibel i a krea mas klaridat pa e partisipashonnan. A pone un inisio na un **plan di formashon pa kreashon di un pool di kandidato na Boneiru ku tin ambishon di bira supervisor**.

Nos ta konsiente ku pa hopi siudadano e situashon ainda ta leu di transparente ku kiko EPB ta trahando, i kua ta e plannan ku ta e base pa esaki. Pa e motibu akí nos ta haña ku den e próksimo periodo di gobernashon nos tin ku trata na profesionalisá i amplia e funshon di komunikashon i splikashon di EPB. **Banda di esei nos ta haña importante ku nos mester amplia nos aksesibilidat digital i ku komo Gobièrnu, huntu ku Reino, nos mester ofresé un funshon di un solo portal pa tur tarea di gobièrnu, na nos siudadanonan i empresarionan**. Den esaki nos no ke pèrdè e habitantenan ku tin ménos abilidadat digital i/òf no tin aksesu digital for di bista. Pa e motibu akí ta bai habri pronto un Klant Contact Centrum (Sentro di Kontakto pa Kliente). Nos ta haña ku tur empleado públiko ku ta traha na EPB, mester por demostrá di ta dominá papiamentu.

E direktoradonan **Ruimte en Ontwikkeling (R&O) i Toezicht en Handhaving (T&H)** tin un papel krusial, di krea kondishon den e próksimo añanan pa por guia e kresementu deseá adekuadamente riba bon ruta i pa garantisá ku e kresementu akí ta na beneficio di nos habitantenan. **Pa MPB e revitalisashon i modernisashon di e dos direktoradonan akí un prioridat èkstra haltu**. Nos ta mira un papel grandi den esaki pa digitalisashon i pa strímlain e maneho di pèrmit.

PRIORIDATNAN FINANSA DI EPB SALUDABEL I UN GOBIÈRNU TRANSPARENTE I ÍNTEGRO

Finansa saludabel

- Institutí Groeifonds;
- Kontinuashon di oumento di Vrije Uitkering;
- Oumentá entrada for di tereno i aktividat di konstrukshon
- Koperashon entre sektor públiko ku sektor privá;
- Posibilitatnan di fianza pa EPB dor di adaptashon di aktual legislashon;
- Reforsá entradanan di Gobièrnu pa por invertí mas den komunidad.

Kapabel, íntegro, serio i un Gobièrnu stabil komo guia pa un mihó Boneiru ku prosperidat hustamente partí, bienestar i standart di bida mas haltu;



- Sigui ku ekstenshon di Akademia di Entidat Públiko Bonaire ku posibilidat di formashon pa empleadonan públiko;
- Profeshonalisá i amplia e funshon di informashon di Entidat Públiko Bonaire, inklusivo sigui amplia aksesibilidad digital;
- Dominio básiko di Papiamentu pa tur empleado públiko di Entidat Públiko Bonaire ta bira un rekisito pa nombramentu
- Kontinuá ku revitalisashon i modernisashon di e aparato di empleado públiko, ku enfoke èkstra riba e direktoradonan Ruimte en Ontwikkeling (R&O) i Toezicht en Handhaving (T&H);
- Kontinuá ku mehorashon di servisio di Gobièrnu na siudadano i sentralisá esaki bou di un dak, ku esaki ademas ta mehorá e maneho i entrega di pèmit;
- Realisá trayekto di formashon lokal pa partisipashon na konsehonan di komisario i di supervishon di kompanianan (NV) di gobièrnu.

Partisipashonnan (kompanianan)

- Un programa di formashon pa personanan na Boneiru ku ke bira supervisor na un partisipashon. E akshonista ta krea un pool huntu ku e partisipashonnan;
- un vishon di futuro transparente pa formashon di e akshonista tokante e interesnan públiko i tambe kon ta garantisá esakinan pa término largu.
- Eliminá fundashonnan ku no ta aktivo i hinka tur e NVnan direktamente bou di e akshonista;
- Implementá di e Code Corporate Governance nobo i aktualisá tur statutonnan di e partisipashonnan i fundashonnan;
- Mantené e base na órden di sigui ku e kuadro di ehekushon, e maneho di rekompensa i e maneho di reklutashon i di selekshon ku a desaroyá den e último añanan;
- Ankra Bureau Deelnemingen bon den e organisashon ku suficiente forsa laboraal pa por konsehá e akshonista ku e responsabilidatnan di akshonista.

#HUNTU



FINALMENTE

Nos ta spera ku nos a duna un bon imágen di nos plannan pa e siguiente kuater añanan di gobernashon ku e programa di elekshon akí. Por ta ku abo ke drenta kombersashon ku nos tokante e plannan, òf abo por tin mas sugerensia tokante esaki. Pa esaki i pa demas pregunta i opservashon, por drenta den kontakto ku nos segun e opshonnan akibou:

Website: www.movementupuebloboneriano.com

Email: frakshon@partidompb.com



#HUNTU

UNÍ NOS TA
MÁS FUERTE



 1 HENNYSON THIELMAN	 2 RENATA DOMACASSÉ	 3 ELVIS TJIN ASJOE	 4 SANNE MEIJER	 5 JUNNY WOUT	 21 GUILLERMO NOGUÉR	 22 RICHARD PALSGRAAF	 23 VERONICA WONG	 24 ZAI DOMACASSÉ	 25 ROBERT WESTER
 6 EDISON ELLIS	 7 DIN DOMACASSÉ	 8 RICHÈNA LOOK	 9 CYRILL VROLIJK	 10 MILENA WINKLAAR	 26 MIENTJE FRANS	 27 SHELLANY SEBELON	 28 VALENTINA BRICE	 29 AQUILES FRANCEES	 30 DESIRÉE CROES
 11 MAZARELLA JANSEN	 12 ANGELO ALBERTO	 13 VANESSA ISAZA	 14 DEBBY RAUWERS	 15 ORPHALINE SALEH	 31 LUCKNER SAUVEUR	 32 RODI MARTES	 33 AMANCIO BATTA	 34 JAN KLOOS	 35 WILSON FRANS
 16 ASHIER MARTINES	 17 MIREYA MARMOL	 18 EDER CURIEL	 19 DILENIA SOSA	 20 NINA KWAKMAN	 36 HUBERT VIS	 37 CHON THEODORA	 38 JAN JANGA	 39 DENNIS MARTINUS	